

# L'ierta da la «DDR»

Il catolicissem en ils «Bundesländer» novs

DA GUIU SOBIELA-CAANITZ

■ **Mintga dus onns dapi 1990 ha lieu in «Deutscher Katholikentag»; empè da quels da 2002 e 2010 han ins arranschà «ökumenische Kirchentage» ensemen cun la baselgia evangelica en Germania. Il lieu mida mintga giada; la dieta è sa splegada duas giadas a Berlin ed ina giada a Karlsruhe, Dresden, Magonza, Hamburg, Ulm, Saarbrücken, Osnabrück, Minca, Mannheim u Regensburg.** Quest onn a Lipsia (passa 550 000 olmas), dals 25 als 29 da matg, ha lieu il tschientavel «Deutscher Katholikentag», pia ina commemoraziun da l'emprim il 1848 a Magonza. Il context è dentant fitg different. La Magonza da 1848 era ina citad catolica en il reginam tradiziunalmain evangelic da la Prussia. A Lipsia en Saxonia percenter han prinzi Gion Fadri (1503–1554), Martin Luther (1483–1546) e Philipp Melancthon (1497–1560) introducì la refurmaziun solennamain da Tschuncaisma 1539. Il 1989 han manifestaziuns paschaiplas iniziadas en la «Nikolaikirche» mess ad ir la fin da la «DDR» totalitara

ed ostila a la religiun, la quala aveva siglientà 1968 la baselgia da l'Universiad a Lipsia. Quest matg 2016 è il catolicissem pia giast en la tgina da la Germania evangelica, gist avant la «Bachfest» (10–19 da zercladur) che vegn ad interpretar t.a. duas versiuns differentas da la «Matthäus-Passion». Johann Sebastian Bach (1685–1750) era «Kapellmeister» (dirigent) da la «Thomaskirche» a Lipsia.

## Ina diaspora

Il stadi «democratic» fundà 1949 e mantegnì per quaranta onns en la sumbriva da l'armada sovietica cumpigliava surtut regiuns da tradiziun evangelica. Pauc lieus da la «DDR» eran restads catolics suenter la refurmaziun, per exempel insaquantas pravendas da Turinga e la regiun soraba da Saxonia: Là ha il catolicissem sustegnì la lingua da la minoritad. En la «DDR» devi vairamain ina diaspora catolica. Co statti oz gist avant il tschientavel «Katholikentag»? La «Frankfurter Allgemeine Zeitung» ha tramessia redactura Mona Jaeger tar la diaspora catolica da Brandenburg e Saxonia (diocesa da Magdeburg). Questa destinaziun

è segir nova per ina part dal public da la «FAZ». L'artitgel è intitulà: «Gott verlassens» (p. 3). L'autura scriva: «Ina gronda part da la gliעד da Lipsia n'è segir betg positiva areguard cristians catolics, anzi gnanca indifferent, mabain perfin disfavuravivla (...). Thomas Sternberg, parsura dal Comité central dals catolics tudestgs (ZDK), ha scrit che quella dieta catolica duaja esser averta per mintga persuna (...). Sia devisa biblica tuna: 'Qua, guardai il carstgaun!' [Gion 19, 5] (...). En vista a la crisa dals fugitivs na pudess quest motto esser pli actual.» Il ZDK n'ha envidà nagina personalitad da la partida populistica AfD a referir u far part d'in podium al «Katholikentag», perquai che lezza haja declerà ch'ins posia duvrar armas da fieu per impedir a fugitivs d'entrar en Germania. Era Burkhard Jung, president communal da Lipsia, è sa distanzia cleramain da lezza partida. Jaeger rapporta lura da la situaziun a Schlieben (2511 olmas, Brandenburg) cun sis baselgias senza spiritual: «Uvestg Gerhard Feige (Magdeburg) ha incumbensà ina squadra da laics d'administrar la pravenda (...). Thomas Hilbrich sto

guardar co ch'el po porscher cults divins mintga dumengia. Sch'i na dat betg almain ina messa mintga quatter emnas, (...) vegn la baselgia in bajetg sco tut tschels (...). 'Quai ch'è mort, è mort' di Thomas Hilbrich. Ma las baselgias da Schlieben na duessan anc betg murir. Perquai maina il frar da Thomas adina puspè cults divins dal pled per la pitschna plaiv; la dunna da Thomas ha frequentà ina furmaziun supplementara per pudair dar la benedicziun. Il Segner fiss magari sulet a Schlieben sch'i na dess la famiglia Hilbrich.»

## Augsegner en Saxonia

Michael Poschlod, dapi diesch onns plevon catolic da Delitzsch (passa 26 500 olmas) en Saxonia, ha l'emprim frequentà ad Erfurt (Turinga) «l'unic lieu da scolaaziun da teologia catolica en la 'DDR'. Lezza experientscha collia per adina ils augsegners creschids si en quel stadi (...). En blers regards èni pli flexibels e plain ideas che quels da la Germania dal vest (...). Plevon Poschlod viva sulet en ils 700 m<sup>2</sup> da la chasa-pravenda sur la baselgia veglia da Delitzsch (...). Ina chasari-

na vegn ina giada l'emna per stirar sias chamischas (...). El n'ha mai gì en senn d'ir utrò, gnanc encunter vest: 'Mes uvestg ha investì en mia scolaziun; ussa stoss jau servir' (...). La diocesa ritga da Paderborn [Rain dal nord – Vestfalia] contribuescha per 70% a las resursas da las pravendas catolicas da l'anteriura 'DDR' (...). En lezza diocesa va ina media da 157 femnas ed umens a messa; en la diocesa da Magdeburg èni dudesch (...). Quest onn han mo dus uffants da Delitzsch fatg lur emprima communiun. Il pli savens ston scolaras e scolars frequentar l'instrucziun religiusa evangelica per mancanza d'ina catolica (...). Catolics e protestants han gia daditg mess ensemen lur suentermezdis d'attempads.» Quai fa endament ina remartga da «La Stampa» (Turin) dals 13 d'avrigl 2016 en connex cun la visita cuminaivla da papa Francestg, patriarc Bartolome ed archuvestg Gironnas als fugitivs sin l'insla greca da Lesvos: «Quai è in exempel da quel 'ecumenissem dal scussal' nua che cristians da differentas confessiuns s'engaschan ensemen per servir tgi che pate-scha.»